


BELA

HERRI KIROLAK

LABURREAN



Jose Luis Ugarte.

Nandor Fa gaur iritsiko da Les Sables

DONOSTIA

Nandor Fa hungariarra gaur goizean iritsiko da ziurrenik Les Sables d'Olonne-ra. Azkeneko miliak egoera normalean egin ditu, inolako arazorik gabe.

Herenegun hitz egin zuen azkeneko aldiz irratiz. «Oso eguraldi ederra egiten du eta jadanik guztia ongi ipini dut helmugarako. Bazkari on batekin egunak daramatzat amets egiten. Batez ere, gauza gozoak jateko gogo daukat; izan ere, duela aste batzuetatik, untzian ez dut azukre-rik», zioen.

Hungariatik hainbat pertsona hurbildu da Frantziako Les Sables d'Olonnera: babesleak, kazetariak, familiakoak eta lagunak. Nazio osoan, guztiak adi-adi daude, interes handiarekin jarraituz bere estropada. Guztiak onartzen dute Nandor Faren kementa eta etengabeko borroka. Vendee Globen daraman untzia, berak egin da eta beste batean ere irten zuen proba honetan. Beraz, «K&H Bank-Matav» untziarekin egiten duen bigarren itzulia da aurtengoa. Nandor Fa Szekesfeverhar herrikoa da eta bertako alkateak ohorezko herritarren domina ezarriko dio.

UGARTE
BEDERATZI
EGUN BARRU

Nandor Fa bera izan da Jose Luis Ugarte bizkaitarrekin Vendee Globen gehien hitz egin duena. Urtarrilaren 19an, euskal nabigariak makina bat arazo pasa zuen ura sartzen zitzaiola eta. Jendea larritu ere egin zen orduan. Nandor Fak berak lasaitu zuen jendea, «Euskadi Europa 93-BBK-ko» nabigaria ongi zegoela esanez. Berak eta Ugartek irratiz azken aldiz astelehenean hitz egin zuten eta bizkaitarrak 15 egunerako janaria geratzen zitzaiola adierazi zion.

Ugarte orain zazpi korapiloko abiaduran nabigatzen ari da, hain motelarekin. Guztiak horrela jarraitzen badu, euskal nabigaria bederatzigarren egun barru Les Sables d'Olonnen egon liteke.

Fiz eta Perurena markak hobetzera Larunbatean Azpeitiko zezen plazan

Jaialdia ikusteko sarrerak 1.500 pezetatan jarriko dira salgai

Atzo aurkeztu zuten Donostian «Euskadi Irratia» markak hobetzen saioa. Jaialdia datorren larunbatean egingo da Azpeitiko zezen plazan, arratsaldeko 16.30etan, eta bertan Martin Fizek Harok 10.000 metroetan duen marka hausteko egingo duen saioaz gain, Iñaki Perurena bi marka hobetzen saiatuko da.

PELLO AIESTARAN / DONOSTIA

«Ea behingoz marka hausten dugun». Hori izan zen Julian Beloki, Euskadi Irratiko zuzendarik datorren larunbatean egingo den jaialdiari begira botatako erronka, Mariano Harok duen marka dela eta. Aurreko urteetan, atzerriko atletak izan ziren marka hori hobetzeko aukeratutakoak. Saio guztiek ordea, porrot egin zuten, eta Haroren markak hor jarraitzen du oraindik ere.

Aurtengo ediziorako gauzak aldatzea erabaki dute antolatzaileek, eta Martin Fiz arabarra izango da saioa egingo duena. Belokiren esanetan, «Mundialean lan ona egin zuen, eta horrek sasoiaren dagoela erakusten digu. Gainera, Jose Manuel Garcia izango du erbi lanetan, eta ondo konpontzen dira. Berak marka hausteko itxaropen osoa du».

Saio honetan aldaketa batzuk izango dira. Orain arte, atleta bakoitza plazaren alde batetik ateratzen zen. Larunbatean, Fiz eta Garcia toki beretik aterako dira. Iñaki Elortzak ziurtatu zuenez, «10.000 metroko errekorraz



Haroren marka hausteko itxaropen osoa dute antolatzaileek. GILLENEA

gain, 5.000 metrokoa ere nahi dugu. Haro eta Bitok dira egungo marka onena dutenak».

Harrojasotzaileei dagokionez, Iñaki Perurena leitzarria bi marka jaialdi berean hobetzen saiatuko da. Bi eskuekin 316 kilokoa jasoko du, eta esku bakarrez 264

kilokoa. «Hasieran bi marka hobetzeko eskaintza benetakoa ote zen zalantzak genituen, baina azkenean ziurtatu egin zen hori eta hementxe dugu. Herri kirolen munduan erakargarria izango da hau», adierazi zuen Julian Belokik.

Hiru arrazoi itzulerako

P.A. / DONOSTIA

Iñaki Perurena izan zen protagonista jaialdiko aurkezpenean. Leitzako harrijasotzailea ez da asko aritu plazetan azkenaldian, baina orain Euskadi Irratiak antolatzen duen jaialdia dela eta, itzultzea erabaki du. Hiru izan dira itzultzeko arrazoi nagusiak. «Ni animatu naiz ha-

riak aldatu egin direlako. Benetako aldea ez dago harrijasotzaileen artean, harrietan baizik. Oraingoak jasotzea errazagoa da. Antidopinari dagokionez, gauza serio bat egin nahi nuen. Orain hori egiteko aukera dago, eta horrek ere animatu nau. Hirugarrenik, halterofilian bezala bi harrien pisua zenbatuta zenbat jasotzen dudan ikusi nahi dut».

PILOTA

Bilboko Deportivo Asegarceren kargu geratuko da epe laburrean


DONOSTIA

Asegarce enpresak hartuko du Bilboko Deportivo frontoia, atzo «El Mundo» egunkariak argitaratutakoaren arabera. Duela aste batzuk, Asegarceko buruek eskuz gain erremintako modalitatearen batean sartzeko aukera ere aipatu zuten, eta badirudi aukera hori gauzatu egin dutela azkenik.

Angel Iza, Deportivoeko gerentearen hitzetan, «palarekin segitzea izan da akordioa lortzeko baldintzetako bat». Asegarcek pilotaren munduan sartu zenetik gauzak nola egin dituen ikusita, palak etorkizun ona izan dezakeela esan daiteke. «Deportivok

berrikuntza beharrezkoa du, hemen oso zaila da jokatzeko», adierazi zuen duela egun batzuk Aia Zulaika pilotariak. «Finantzaketa onarekin, palak arrakasta izango du Bilbon», Angel Izaren iritziz. Badirudi Asegarcek apustu gogorra egin duela palan sartzeko, eta aurrera ateratzeko behar den guztia egingo duela. Palak dituen zaletuek merezi dute hobekuntza, eta dirudienez Asegarcek hori egin dezake.

Eskuzko kontuetan, gaur Beloki eta Alustizak material hautaketa izango dute Labriten, 16.00etan. Bihar Irazola eta Eugiren txanda izango da Eibarko Astelenan, goizeko 11.00etan.



Ruben Beloki.

L. ARZUAGA

KRABBE urte baterako zigortu dute

Katrin Krabbe alemaniar atleta, urtebeterako zigortu dute klenbuterol hartzeagatik. Alemaniako Federazioak Grit Breuer ere arrazoi berberagatik zigortu du. Zigor hau iragan abuztuko 13tik indarrean jarriko da. Beraz, ez zaio asko falta Krabberri berriro probetan parte hartzeko. Manuela Derr ere zigortu dute, baina zortzi hilabeterako baino ez. Apirilaren 25ean itzuli ahal izango da Derr.

MARTIN FIZ Kros Sarian txapeldun

Martin Fiz arabarra Espainiako Atletismo Federazioak antolatzen duen Kros Sario txapelduna izan da 490 punturekin. Bigarren postuan Carlos Adan sailkatu da 415 punturekin. Emakumezkoetan, onena Julia Vaquero izan da bere 555 punturekin. Bigarrena Estela Fuentes 455ekin. Federazioak sarietan sei milioi pezeta (300 mila libera inguru) banatuko ditu.

CANTONARI isuna jarri diote jendeari txistua botatzeagatik

Manchester United-eko futbol jokalaria den Eric Cantonari 174.000 pezetako (8.700 libera gutxi gora-behera) isuna ipini dio Ingalaterrako Federazioak, bere taldeak Leeds United-en kontra jokatu zuen partiduko ikusleei txistua botatzeagatik. Zaletuek ia neurketa osoan zehar, jokalariek frantziararen aurka oihuka aritu ziren eta honek aldageletara zihoala bota zien txistua.

ARISEK 300 milioi baino gehiago galduko ditu

Salonikako Aris saskibaloit taldeak 300 milioi pezeta (15 milioi libera inguru) galduko ditu Nazioarteko Federazioak (FIBA) jarri dion zigorrak. Arisek ezingo du Europako (sailkatzen denean) bi urtean jokatu. Zigor hau Europako Kopako finalean bere zaletuek izan zuten portaera zakarrarengatik jaso du.